



Pranimi / Dërruzat Prilijeno/Prodato Received/Delivery	09.12.2020	0	viti god year
Organ /Njësia Organ /Entiteti Org /Unit	Nr Prot Pr Prot Prot No	Shtojca Pulog Appendix	Sasia Kolicina Quantity
SKRASHICK	3054	2020	114



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.330/2020

Këshilli i Pavarur Mbikëqyrës për Shërbimin Civil të Kosovës–Kolegji për shqyrtimin e ankesave i përbërë nga: Ardita Haxhnikaj-Demi-kryetare, Eshref Shabani dhe Arben Mehmeti- anëtarë, me Zyle Millaku Gojnovci-Zyrtare e lartë për Bashkëpunim Profesional në cilësinë e procesmbajtëses, ka shqyrtuar ankesën A.nr.330/2020 të datës 27.10.2020, të parashtruar nga [REDACTED], me adresë banimi Rr. "Ahmet Krasniqi" pa numër Mitrovicë, kundër organit të punësimit Ministria e Tregtisë dhe Industrisë, në çështjen juridike "kërkesë nga marrëdhënia e punës", duke vepruar në pajtim me nenin 6 paragrafin 1 nen paragrafin 1.1, nenin 18 paragrafin 1 nen paragrafin 1.3 dhe 1.4 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregullores Nr. 03/2018 për Rregullat dhe Procedurat e Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 09.12.2020, mori këtë:

V E N D I M

- I. **APROVOHET** pjesërisht si e bazuar ankesa A.nr.330/2020 e datës 27.10.2020 e parashtruar nga ankuesi [REDACTED]
- II. **DETYROHET** Sekretari i Përgjithshëm i Ministrisë së Tregtisë dhe Industrisë që të ndërmarr veprimet e duhura procedurale të përcaktuara me legjislacionin në fuqi që rregullon çështjen e shtesave për kushtet specifike në punë, për ankuesin, brenda afatit prej 15 ditësh nga dita e pranimit të këtij vendimi.
- III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

[REDACTED], Inspektor për Sigurinë e Pajisjeve Elektrike, në Ministrinë e Tregtisë dhe Industrisë, më datë 23.10.2020, nëpërmjet postës numër R9736782, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimet ankimore për kompensimin e shtesës mbi pagën bazë për shkak të kushteve specifike të punës, dhe

harmonizimin e pagës nga koeficienti shtatë (7) në tetë (8). Ankesa e ankuesit është pranuar më datë 27.10.2020 dhe është protokolluar me numër Nr. Prot"2284/2020.

Këshilli i Pavarur Mbikëqyrës për Shërbimin Civil të Kosovës, më datë 29.10.2020, ankesën e ankuesit e ka proceduar për përgjigje në ankesë të Ministria e Tregtisë dhe Industrisë. Kjo e fundit më datë 06.11.2020 ka përcjell gjithë dokumentacionin lidhur me këtë lëndë.

Kolegji për shqyrtimin e ankesave ka administruar këto prova: Ankesën A nr.330/2020 të datës 27.10.2020, drejtuar Këshillit të Pavarur Mbikëqyrës për Shërbimin Civil të Kosovës; Vendimin Nr.5880 i datës 04.09.2020; Akt Emërimit e datës 30.01.2012; Përshkrimin e detyrave të punës i datë 31.07.2012; Titujt e vendeve të punës të plotësuar dhe ndryshuar në katalogun e vendeve të punës në Shërbim Civil të Kosovës; Kërkesën me numër të protokollit 4867 të datës 13.08.2020; Kërkesën e datës 04.09.2020; Kontratë e punë datës 01.07.2010; Kontratë e punë datës 01.07.2011; Përshkrimin e detyrave të punës i datë 01.07.2011; kopje e konkursit; Kërkesë e datës 24.12.2012; Vendim i datës 27.12.2013; Vendim i datës 19.12.2016; Kërkesën me numër të protokollit 6865 të datës 03.09.2020; Emalin e datës 03.09.2020; Kërkesën e datës 05.05.2020; Aktvendimin me numër të protokollit 5699 të datës 01.09.2020; Aktvendimin me numër të protokollit 5700 të datës 01.09.2020; Përgjigjen në ankesë me numër të protokollit 2496 të datës 06.11.2020; Listën e Pagës nga data 01.09.20120 deri me date 30.09.2020; Lista e pozitave në Shërbim Civil; Kërkesën për shpalljen e konkursit të jashtëm; Emalin e datës 22.09.2020; Emalin e datës 10.09.2020; Vendimin e datës 04.11.2020 me numër të protokollit 8251/20; Emalin e datës 04.11.2020; Kërkesën sipas Qarkores Buxhetore 2021/02 me numër të protokollit 6531 të datës 25.09.2020; Qarkoren Buxhetore 2021/02, me shkresat e bashkangjitura.

Kolegji për shqyrtimin e ankesave, pasi ka shqyrtuar të gjitha shkresat e lëndës të parashtruara nga palët, ka konstatuar se ankesa e parashtruar nga ankuesi është *pjesërisht e bazuar, sepse:*

Kolegji për shqyrtimin e ankesave, në bazë të Akt Emërimit të datës 30.01.2012, ka konstatuar se parashtruesi i ankesës mban pozitën e punës Inspektor për Sigurinë e Pajisjeve elektrike, në Ministrinë e Tregtisë dhe Industrisë.

Ankuesi ka parashtruar ankesë kundër mosveprimit gjegjësisht mos zbatimit të vendimit nr.5876 të datës 04.09.2020 të Sekretarit të Përgjithshëm, për harmonizim të koeficientit të pagës nga shtatë (7) në tetë (8), dhe kundër mosveprimit në realizimin e shtesës në pagë për shkak të kushteve specifike në punë dhe punës jashtë orarit, siç përcaktohet me dispozitat e Ligjit Nr.04/L-186 për Ndryshimin dhe Plotësimin e Ligjit Nr.03/L-181 për Inspektoratin dhe Mbikëqyrjen e Tregut, i publikuar në Gazetë Zyrtare me datë 10.05.2013.

Lidhur me pretendimin ankimor të ankuesit për shtesën në pagë për shkak të kushteve specifike në punë, Kolegji për shqyrtimin e ankesave, duke analizuar legjislacionin në fuqi, ka konstatuar se dispozitat e Ligjit Nr.04/L-186 për Ndryshimin dhe Plotësimin e Ligjit Nr.03/L-181 për Inspektoratin dhe Mbikëqyrjen e Tregut, përkatësisht neni 10.A paragrafi 1 përcakton së: "Inspektorëve të tregut i njihet e drejta e marrjes së pagesës shtesë mbi pagën bazë,

për shkak të kushteve specifike në punë dhe punës jashtë orarit të punës”, andaj, si rrjedhojë Kolegji për shqyrtimin e ankesave, vlerëson se ankuesit, respektivisht Inspektorëve të Tregut, sipas dispozitave të ligjit të veçantë, iu njihet e drejta e marrjes së pagesës shtesë mbi pagën bazë, për shkak të kushteve specifike në punë mirëpo duke u bazuar në paragrafin 2 të këtij neni ku përcaktohet së: Shtesat sipas paragrafit 1. të këtij neni do të bëhet konform Ligjit përkatës për shërbimin civil të Republikës së Kosovës dhe Ligjit përkatës për pagat e nëpunësve civil, Kolegji vlerëson se realizimi i shtesës për kushte specifike të punës për ankuesin mund të bëhet vetëm pas aprovimit nga institucionet përgjegjëse respektivisht Ministria përgjegjëse për administratë publike, siç parashihet me dispozitat e Ligjit Nr.03/L-147 për Pagat e Nëpunësve Civil, përkatësisht nenin 16 paragrafi 1, ku përcaktohet se: ... institucioni kërkon miratimin e një shtese për kushte të punës për këta nëpunës civilë, sipas aktit nënligjor të përcaktuar në paragrafin 2. të këtij neni, si dhe dispozitat e Rregullores Nr.33/2012 për Shtesat në Pagë dhe Kompensime të Tjera të Nëpunësve Civilë, përkatësisht nenit 7 paragrafi 3 ku përcaktohet se ... për aprovimin e shtesës për kushte të veçanta, institucioni duhet t'i ofrojë Ministrisë përgjegjëse për Administratë Publike kërkesën që përmban: 3.1 arsyeshmërinë për pagimin e shtesës për kushte specifike të punës për pozitën (at) përkatëse; 3.2 listën e pozitive përkatëse, gradat dhe numrin e nëpunësve civilë për çdo pozitë; 3.3 detajet, sipas të cilave, secila pozitë përkatëse pritet të jetë e ekspozuar ndaj rrezikut; 3.4 koston vjetore të vlerësimit financiar të shtesave për kushte specifike të punës.

Andaj, Kolegji për shqyrtimin e ankesave, pas analizimit të bazës ligjore dhe konstatimit se me dispozitat e ligjit të veçantë ankuesit i është njohur e drejta në shtesë për kushte specifike në punë, vlerëson se Ministria e Tregtisë dhe Industrisë duhet të ndërmarr veprimet e duhura procedurale për trajtimin e çështjes që është objekt i kësaj ankese, siç parashihet me dispozitat e nenit 16 paragrafi 1 të Ligjit Nr.03/L-147 për Pagat e Nëpunësve Civil, si dhe dispozitat e nenit 7 të Rregullores Nr.33/2012 për Shtesat në Pagë dhe Kompensime të Tjera të Nëpunësve Civilë, në këtë kuptim Kolegji ka vendosur për aprovim të pjesshëm të ankesës dhe detyrimin e organit punëdhënës si në dispozitiv të këtij vendimi.

Ndërsa lidhur me pretendimin ankimor të ankuesit për njohjen e të drejtës për kompensimin e shtesës për kushte specifike të punës, në mënyrë retroaktive duke filluar nga data 21.09.2018, Kolegji për shqyrtimin e ankesave, ka konstatuar së Ligji Nr.04/L-186 për Ndryshimin dhe Plotësimin e Ligjit Nr.03/L-181 për Inspektoratin dhe Mbikëqyrjen e Tregut, është publikuar në Gazetë Zyrtare me datë 10.05.2013, ndërsa ankuesi ka parashtruar ankesë me datë 27.10.2020, andaj vlerëson se pretendimi ankimor për kompensimin e shtesës në mënyrë retroaktive është i pa bazuar për faktin se ankesa është parashtruar në kundërshtim me dispozitat e Ligjit për Procedurën e Përgjithshme Administrative, ku përcaktohet se; *Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ.*

Lidhur me pretendimin ankimor të ankuesit për harmonizimin e koeficientit të pagës nga shtatë (7) në tetë (8) sipas vendimit nr.5871 të datës 04.09.2020 të Sekretarit të Përgjithshëm të Ministrisë së Tregtisë dhe Industrisë, Kolegji për shqyrtimin e ankesave gjatë shqyrtimit të lëndës ka gjetur së ankuesi ka themeluar marrëdhënien e punës në Ministrinë e Tregtisë

dhe Industrisë, në pozitën e punës "Inspektor për Sigurinë e Pajisjeve elektrike" me koeficient të pagës shtatë (7), është pajtuar me kushtet e punësimit respektivisht koeficientin e pagës duke nënshkruar Aktin e Emërimit të datës 31.01.2012. Si rrjedhojë, Kolegji ka konstatuar se Sekretari i Përgjithshëm i Ministrisë së Tregtisë dhe Industrisë, përmes Vendimit nr.5871 të datës 04.09.2020 ka aprovuar kërkesën e ankuesit për harmonizim të koeficientit të pagës nga shtatë (7) në tetë (8), mirëpo me datë 03.11.2020 përmes vendimit me numër të protokollit 8251, ka pezulluar zbatimin e vendimit nr.5871 me arsyetimin se Ministria e Tregtisë dhe Industrisë nuk ka buxhet për harmonizimin e koeficientit të pagës. Andaj, duke marr parasysh se vendimi i lartcekur i organit të punësimit, në mungesë të buxhetit është pezulluar, Kolegji për shqyrtimin e ankesave vlerëson se pretendimi ankimor i ankueses është i pa bazuar.

Kolegji për shqyrtimin e ankesave, bazuar në këto rrethana, pas analizimit dhe vlerësimit të të gjitha shkresave të lëndës si dhe duke u bazuar në kompetencën e Këshillit, vendosi si në dispozitiv të këtij Vendimi.

Në rast të moszbatimit të vendimit të Këshillit nga personi përgjegjës i përcaktuar në dispozitiv të këtij vendimi, Kryetari i Këshillit ndërmarr të gjitha veprimet në pajtim me nenin 21, 23 dhe 24 të Ligji Nr.06/L-048 për Këshillin e Pavarur Mbikëqyrës për Shërbimin Civil të Kosovës, duke aplikuar edhe ndalimin e 50% të pagës mujore për personin përgjegjës, deri në zbatimin e vendimit të Këshillit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë - Departamenti Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.330/2020

Zyle Millaku GOJNOVCI

Procesmbajtës

Ardita HAXHNIKAJ-DEMI

Kryetare e Kolegjit

Vendimi i dërgohet

- Ankuesit [REDACTED]
- Sekretarit të Përgjithshëm të Ministrisë së Tregtisë dhe Industrisë;
- Udhëheqësit të Burimeve Njerëzore në Ministrinë e Tregtisë dhe Industrisë; dhe
- Arkivit të KPMSHCK-së